

Lezioni te Museo per i hotelieres

Dò l suzess de l'uton passà i hotelieres de Fascia taca endò via sia formazion culturèla e linguistica ladina delaite dal Projet Ladinhotel

Cultura - Dò la fin de la sajón da d'invern i hotelieres del Ladinhotel se endreza endodanef a ge dèr neva parbuda e gaissa a sia vida de tor sù i ghesć con contegnui de cultura e lengaz ladin. Jà chest uton passà l'è stat endrezà, delaite dal Projet Ladinhotel, na lingia de scontrèdes de aprofondiment de la cultura e del lengaz ladin tras la proiezion de curc video e tras confronc sun desvalives arguments co la colaborazion de l'Ofize linguistich del Comun general de Fascia e de l'Istitut cultural ladin.

L'Istitut cultural ladin porta dant i contegnui de la storia, de la cultura e de la sozietà ladina da zacan e dal dì d'anché tras videoclip de presciapech mesora co na curta discusion a chela che tolarà pèrt l'publich te sala. Na ora de formazion per operadores economics che à voa de cognoscer più inout sia reijes e sia identità, per poder viver miec

sie teritorie e ge l sporjer con maor ferstont a sie ghesć.

Fora per l'aisciuda l'è stat pissà cater scontrèdes. Dò da chela stata en mèrcol passà su la sala dedichèda a "I tempes neves", l'nef apuntament é en mèrcol ai 2 de mé, te Sala Heilmann del Museo ladin, olache vegnarà moscià n video de documentazion sun la vita de Tita Piaz; ai 9 de mé enveze l'argoment sarà chel de la conties da zacan vedudes coi eies da anchecondi; l cors se serarà sù en mèrcol ai 16 de mé col video-documentar del Molin e de la Sia, semper tel medemo post e da la medema ora.

Comun general, joegn hotelieres e Istitut cultural ladin laora ensema per valorisèr l patrimoni economich, turistich e culturèl ladin. La scontrèdes é avertes a duta la jent che se dèsc jù tel ciamp economich, sozièl e culturèl e a duc i pascioné.



I hotelieres de Fascia a lezion te Museo.